

四庫全書

集部

欽定四庫全書

兩宋名賢小集卷二百七十四

宋 陳 思 編

元 陳世隆 補

石屏續集 二

戴復古

飲中

布衣不換錦宮袍
刺骨清寒氣自豪
腹有別腸能貯酒

天生左手慣持螯繩頭驥尾宜千里鶴在雞羣亦九臯
賢似屈平宜獨醒不禁憔悴賦離騷

靜齋張敏則舍人贈詩因用其韻為酬

胷次詩書一派清學如耕稼到秋成十年閉戶存吾道
萬事無心逐世情葉落花開闕氣數山長水遠是功名
摩挲老眼看新貴九鼎鴻毛孰重輕

容遊

不能鬱鬱窟中藏大笑出門遊四方與世周旋持酒盞

觀人勝敗坐碁坊倒餐甘蔗入佳境盡著錦衣歸故鄉
此志十年猶未遂倚樓心事楚天長

新安寒食

不擬今年到歙州要知行止豈人謀一百五日客懷惡
三十六峯春雨愁老矣此身猶道路淒其歸夢繞松楸
花飄仙子無由見千里江山負遠遊

烏聊山登覽

抖擻罽塵上翠微傍溪寺上坐題詩忽聞啼鳥不知處

細看好山無厭時
風掃雲煙開遠景
人攜香火謁荒祠
客來千里登臨意
說與時人未必知

癖習

平生癖習未全除
虛事經心實事疎
為惜落花慵掃地
每看脩竹欲移居
逢人共作亡何飲
撥冗時觀未見書
爭奈一貧隨我在
思量不若把犁鋤

趙升卿有官不肯為
里居有賢聲訪之於深巷中
深居陋巷不妨幽
翠竹當門水滿溝
每遇事來先學嬾

欲為官去又還休，田園自樂陶元亮。鄉里多稱馬少游。

除却讀書無所好，有時閒作北巖遊。

郎化城巖也

括蒼石門瀑布

一泊竹門觀瀑布，明知是水却疑非。亂拋雪玉從天下，散作雲煙到地飛。夜聽蕭蕭洗塵夢，風吹細細濕人衣。謝公蠟屐經行處，聞有留題在翠微。

杜門自遣

世事茫茫心事灰，衆人爭處我驚回。閉門不管花開落。

避俗惟通燕往來富貴在天求不得光陰轉地老相催
平生任達陶元亮千載神交共一杯

登快閣黃明府強使和山谷先生留題之韻

未登快閣心先快紅日半簷秋雨晴宇宙無邊萬山立
雲煙不動八窗明飛來一鶴天相近過盡千帆江自橫
借問金華老仙伯幾人無忝入詩盟

秋日病餘

桂子吹香風露深老夫吟了聽蟬吟秋來賸有湖山興

病後全無涉世心
詩苦積成雙白鬢
酒豪輕用萬黃金
平生意氣今如許
獨抱傳家一破琴

都中懷竹隱徐淵子直院

手攜漫刺訪朝官
爭似滄洲把釣竿
萬事看從今日別
九原叫起古人難
菊花到死猶堪惜
秋葉雖紅不耐觀
多謝天公憐客意
霜風未忍放深寒

詠梅投所知

留積之水
林中作

潔白無瑕美不嬌
炯如珠玉粲林臯
獨開殘臘與時背

奄勝衆芳其格高欲啓月中休種桂如何仙苑却栽桃
不將品質分優劣痛飲花前讀楚騷

簡陳叔方問病

聞君卧病知何病醫者難從脉上尋自是讀書多損氣
或緣憂國重驚心飽參妙理牀頭易細寫幽懷膝上琴
蛇影無疑自無恙此方何止直千金

衡山主簿朱行甫留度歲

衡山之下湘江上風月留連去較遲四海弟兄多不遇

一門父子兩相知
梅邊竹外三杯酒
歲尾年頭幾局碁
羈旅宦遊俱是客
細論心事共題詩

家中作

四海飄零似落花
十年秋鬢帶霜華
歸無駟馬空題柱
敝盡貂裘忙到家
觸目半成愁境界
安心旋辦老生涯
可憐持蟹持盃手
小圃攜鋤學種瓜

蕭學易何季臯和作別詩佳甚再用前韻

少年行脚白頭歸
不負平生汗漫期
望斷海山雲漠漠

愁生江路草離離一篇王粲登樓賦幾首巴陵送別詩
獨倚篷窗無意緒瓦盆傾酒憶金卮

趙用甫提舉夢中得片雲不隔梅花月之句時被
命入朝雪中送別用其一句補以成章

一時議論動諸公有詔西來玉節東又見清朝更大化
好趨丹陛奏孤忠片雲不隔梅花月一雪翻成柳絮風
把酒莫辭今日醉明朝車馬去匆匆

兩宋名賢小集卷二百七十四

欽定四庫全書

兩宋名賢小集卷二百七十五

宋 陳 思 編

元 陳世隆 補

石屏續集 三

戴復古

九日

今日知何日他鄉憶故鄉
黃花一杯酒白髮幾重陽
日

晚鴉爭宿天寒雁叫霜
客中無此醉何以敵淒涼

郭外翁

郭外生涯少城中糴米稀
種花無處賣挑菜入籃希
風撼傾欹屋寒生藍縷衣
此翁何所樂談笑傲輕肥

山村

野老幽居處成吾一首詩
桑枝礙行路瓜蔓網踈籬
牧去牛將犢人來犬護兒
生涯雖樸畧氣象自熙熙

吳門訪舊

孟良夫侍郎
有藏春園

去此十三秋重來雪滿頭鏡顏加老醜詩骨帶窮愁鳥
語新晴樹人尋舊倚樓藏春門下客一半落山丘

登祝融

秋風吹拄杖直到祝融巔目擊三千界肩摩尺五天扶
桑暘谷畔青艸洞庭邊雲氣無遮障分明在眼前

山中少憩

地僻人稀到山寒水欲冰聞鐘知有寺見火不逢僧斷
隴森喬木頽簷挂古藤清溪照孤影詩骨瘦峻嶒

鄂州戎治靜憩亭

幽亭何處尋巖樹碧森森
獨坐生雲石少安
經世心伴人雙鶴
立多事一蟬吟
提劍翻然起中原
秋草深

趙端行杜子野遊虎丘有詩僕因思舊與趙子野
同宿唱和留韻

出城十里許有此一山門
丘在虎無迹池清劍有痕
孤松冠巖頂萬竹繞雲根
借問東軒壁舊題存不存

杜仲高高九萬相會

杜癖詩無敵高髯畫絕倫笑談能不朽富貴或成塵今
古多奇事乾坤幾怪民相逢不容易一醉楚江濱

懷趙德行

學慈湖從
趙元道遊

所學源流遠澹交滋味長看來渾易與別去自難忘獨
客夢千里佳人天一方細觀賓退錄亦足慰淒涼

鄭南夫雲林隱居

一來陪勝踐再到惜蹉跎記得山中景行尋竹外坡天
寒梅信早海近雁聲多煙渚蒲州外時間款乃歌

白鶴觀

荒徑行如錯螭松看轉奇鳥聲人靜處山色雨晴時
得溪翁酒間尋道士碁箇中有佳趣莫怪下山遲

三山宗院趙用父問近時因舉今古一凭欄夕陽
山外山兩句未得對用父以利名雙轉轂對上句
劉叔安以浮世夢中夢對下句遂足成篇和者頗
多僕終未愜意都下會李好謙王深道范鳴道相
與談詩僕舉此話鳴道以春水渡旁渡為對當時

未覺此語為奇江東夏潦無行路逐處打渡而行
漂水界上一渡復一渡時夕陽在山分明寫出此
一聯詩景恨不得與鳴道共賞之

世事真如夢人生不肯間利名雙轉轂今古一凭欄春
水渡旁渡夕陽山外山吟邊思小范共把此詩看

一夕夢與邵武守趙用父邵武宰王子文浦城宰
陳叔方相會甚竅詩以記之

鼎足當州縣別來音問稀故人俱顯達吾道亦光輝三

鳳夢中見孤鴻天外飛應憐江海客白首未成歸

焦山

江接海冥冥山連島樹青似非人境界宜有佛宮庭藏
壓蟠龍宅潮滄瘞鶴銘西巖更清絕心與酒俱醒

金山

水湧孤峯出波聲日夜聞重巖載華屋雙塔礙行雲天
地八窗迴江淮兩岸分登臨多感慨北雁又成羣

訪古田劉無競

潛夫宰建陽有聲人
言自有建陽無此宰

前說建陽宰古田今似之難兄與難弟能政更能詩文字定交久江湖識面遲人傳花萼集俱受水心知

濠州春日呈趙教授

體國

柳似眠初起梅雖老可觀冰開春水濶風暖雪泥乾得酒忘為客談詩不論官無人知此意一笑對黃冠

自漳州回泉南主僕俱病遣懷

雅興難忘酒羈懷不耐秋坐窮思賣劍扶病強登樓適有座中客來從邊上州所談驚老耳身世併成憂

舟中九日

水濕勞牽纜天寒早
雨霜沙頭沽濁酒
船上作重陽籬菊
一枝瘦溪魚三寸長
客中成小醉亦可慰淒涼

哭澗泉韓仲止二首

雅志不同俗休官二十年
隱居溪上宅清酌澗中泉
慷慨傷時事淒涼絕筆篇
三編遺稿在當並史書傳
忍貧長傲世風節似君稀
死後女方嫁峽中兒未歸
門人集詩稿故卒服麻衣
澗上梅花發吟魂何處飛

江上夜坐懷嚴儀卿李友山

江清天影動樓近角聲雄楊柳枝枝月芭蕉葉葉風佳
人難再得良夜與誰同別後從何晤新詩句句工

兩宋名賢小集卷二百七十五

欽定四庫全書

兩宋名賢小集卷二百七十六

宋 陳思 編

元 陳世隆 補

石屏續集 四

戴復古

樓上觀山

九陌黃塵沒馬頭
人來人去幾時休
誰家有酒身無事

長對青山不下樓

林下得月以木陰蔽遮為恨

夏日思栽千樹林月明恨不掃繁陰眼前物物皆如此
世事何能兩遂心

越上青店候別楊休文

千載江湖共此心老來相見怕分襟
手搔白髮望君至
車馬不來溪水深

衡陽舟中

蕭蕭風雨送行舟
小泊垂楊古渡頭
不忍緩行江上路
落梅片片是詩愁

村景

簫鼓迎神賽社筵
藤枝搖曳打鞦韆
坐中翁媪鬢如雪
也把山花插滿顛

溪上

山腰有路穿脩竹
水面無橋涉淺沙
夾岸人家盡農圃
秋風吹老木棉花

周子益年八十赴殿

七十漁竿八十翁，釣絲輕裊荻花風。
功名未遂英雄老，人道磻溪即箇中。

拋却漁村老釣竿，手遮西日上長安。
青衫著了尋歸路，莫過羊裘七里灘。

觀捕黃雀

披綿爭啄晚禾秋，決起森然網柝喉。
一飽等閒輸性命，知機萬不及沙鷗。

九日

醉來風帽半欹斜，幾度他鄉對菊花。
最苦酒徒星散後，見人兒女倍思家。

贛州上清道院呈姚雪篷

短山不礙遠山青，無事燒香讀道經。
時把一杯非好飲，客懷宜醉不宜醒。

無題

憶聞春燕語雕梁，又聽秋鴻叫斷腸。
一縷沈煙飛不過。

兩樓相對立斜陽

到南昌呈宋原文伯仲

一秋無便寄平安
新雁聲聲報早寒
昨夜檢衣開破篋
去年家信把來看

李敷文酌別席上口占

客子明朝早問程
尊前今夜若為情
使君亦恐傷離別
不使佳人唱渭城

題梅嶺雲封

東海邊來南海邊長亭三百路三千飄零到此成何事
結得梅花一笑綠

綠陰亭自唐時有之到今五百年盧肇二三公題
詩之後吟聲寂寂久矣亭前古木不存綠陰之名
殆成虛設今詩人李賈友山作尉於此實居此亭
公事之暇與江山風景相應接境因人勝見於吟
筆多矣友人石屏戴復古訪之相與周旋於亭上
題四絕句以記曾來

五百年前作此亭亭前古木綠陰清而今古木無存者
賴有新亭襲舊名

慘慘秋風吹客襟唐人遺迹宋人吟浮雲世事多遭變
不獨此亭無綠陰

千山橫碧一溪清白鳥飛邊落照明吏散庭階一無事
綠陰亭上又詩成

正是國家多事秋渝川縣尉亦風流吟詩不廢公家事
坐使孟郊輸一籌

既別諸故舊獨黃希聲往曲江稟議未回不及語
離

別盡諸君不見君客愁多似海南雲一聲何處離羣雁
那向江村靜處聞

老年懷抱晚秋天欲去思君重黯然聞道歸來有消息
江頭錯認幾人船

寶覺僧房

溪近泉聲在枕邊月移梅影到窻前水沈煙冷燈花落

半夜酒醒人不眠

題尹惟曉芙蓉翠羽圖

何人妙筆起秋風
吹破枝頭爛漫紅
翠羽飛來又飛去
一心祇在蓼花叢

廬山馬上

青松路徑白雲闕
有客來尋半日間
十載灞橋驢子上
爭如騎馬看廬山

巾子山翠微閣

雙峯直上與天參，僧共白雲棲一庵。
今古詩人吟不盡，好山無數滿江南。

贈饒叔虎談易論命多奇中

中年多病早衰翁，詩不能工枉受窮。
郊島五行君識否，要知我命與渠同。

湖南漕李革夫被召乃丐歸

浪說歸朝歸豫章，新居萬柳百花旁。
何如表奏明光殿，乞取東湖作醉鄉。

軒冕難遮兩鬢華官居雖好不如家一心懶上朝天馬
要趁東風歸種花

招山乃詩人劉叔擬故居朱清之得其地清之赴
南宮中道而返就招山卜築不久亦去世

半路袖回攀桂手一生方遂買山心要知此老風流處
來向劉郎吟處吟


有錢可買滄浪景無術能留夢幻身一段江山寄愁絕
百年不見兩詩人

清明傷感

客中今日最傷心
憶著家山松樹林
白石岡頭聞杜宇
對他人墓亦沾襟

寄劉潛夫

八斗文章用有餘
數車聲譽滿江湖
今年好獻南郊賦
幕府文書有暇無



兩宋名賢小集卷二百七十六

欽定四庫全書

集部

兩宋名賢小集卷二百八十七至

詳校官中書臣 閔思毅

助教臣 常循覆勘

總校官編修臣 王燕緒

校對官助教臣 汪錫魁

謄錄監生臣 朱恩

欽定四庫全書

兩宋名賢小集卷二百七十七

宋 陳思 編

元 陳世隆 補

端平詩集

汝陽周伯強與予同庚生同寓里相與往來論詩三十餘年嘗手刊端平集十二卷行於世伯強十七八時即博聞彊記侍乃翁晉仙已好吟洎長而四十年

間宦游吳楚江漢足跡所到所作於七國兩漢三國
六朝隋唐之體靡不該備聲騰名振江湖人皆爭先
求市但卷帙中有晚學未能曉者稍多予恐有不行
之弊滋於古體歌詩五言律七言律并五七言絕句
摘其坦然者兼集外所得者近二百首目為端平詩
雋俾萬人海中續芸陳君書塾入梓流行庶使同好
者便於看誦吾伯強平生心不下人今隔九原聞予
此選必不以予為謬竇祐丁巳冬至日荷澤李龔和

父述

黃鶴樓歌

城上危樓高縹緲
城下澄江復相繞
有時漾影入中流
俯看游魚仰飛鳥
近樓多少未行舟
滿江落花灑汀洲
人同江狎不怕浪
登樓對酒彈箜篌
大別山頭白雲起
金口渡邊雨如洗
半鈎新月上孤城
還照高樓與江水
晴江依舊瀉潯陽
黃鶴無由歸故鄉
一聲玉笛起何處
燕撲闌干花影長

韜光庵

谷鳥與我言，怨殺白太傅。借問何以然，攜却山僧去。山僧未去時，前盤一尾蛇。後踞一頭虎，吸雲嘯風遠。窻戶山僧已去了，鶴來踏翻藤。猿到拗折樹，亂篠枯柴塞。行路抑將廬于嵩，高之陽溫洛之澣。諸天散花復呵護，抑將慕羶逐臭亡。魂喪魄委枯骸於北邙之狐兔，荒臺兮尚存破屋兮如故。惟有山僧不知處，世間萬事誰始終。極目寒江起烟霧。

牡丹

江南牡丹凡有幾德安打頭歛為二金陵舊物間有之
池陽吳郡皆居次地近京畿種偏好鄂城栽接不草州
春土篩泥繞畫欄石甃方壇淨如掃當頭第一帶鞞紅
膩紫嬌黃別作叢盤盃追出最迎日碧玉萬片藏春風
寶葉絲絲帶縷金錦斑酒暈間攢心翻騰梔茜亂朱粉
樣各數名分淺深低樹猶高五六尺重花剛枝反無力
迥出層陰轉耐看始悟年深有真色晚添細雪來相簇

露醒香薷冷方浴倚柱黃昏眼倍明頓覺夜闌須秉燭
洛水芳林應更多不禁飛雨洗銅駝酥煎送酒有人在
草沒故園無奈何莫對餘春起嘆嗟最難保守是繁華
君看南渡百年內看到子孫能幾家

戴式之垂訪村居

故人手持一緘書扁舟清晨造我廬為問舟從何方來
欲應未應先長吁長安平旦朱門開曳裾鞞履喧春雷
獨有詩人貨難售朔雪寒風常滿袖孤館青燈不自聊

短帽鶉衣競相就，獬豸峩冠豈無事。不觸姦邪觸詩士，
雖當聖世尚寬容。滔滔寧免言為諱，軒瑟齊竽本難遇。
長編巨軸添憂慮，松菊荒蕪歸計遲。欲向何門誦佳句，
君不見古者防川不禁口。里諺封諛無不有，美刺箴規
三百篇刪取皆經聖人手。漢魏著述充層雲，來擷花草
香紛紛。其間國政最親切，世許少陵能愛君。交衢謗木
求胥誨，盛若勛華猶不改。風雅遺音儻尚存，篇篇道鐸
皆應採。小人幾度邪侵正，何嘗斷隔無歌詠。風雨瀟瀟

鷄自鳴誰顧寒莎響蛙黽但恐君詩未工耳工則奚愁
強疵毀益藉譏評達九重送起聲名赤霄裏況於時事
無交涉做做寒山題木葉千齡得失寸心知笑爾隨羣
走干謁請君頭上巾為君抖却岐路塵解君身上衣為
君拂去京洛緇三濯三洗清冷池一日失機械二日忘
是非三日天籟呼吸吹勇捋浸刺付流水開口盡作歡
喜辭天臺石橋春已知別有野鶴相追隨苟欲避世不
可遲請君歸君勿疑

將適毘陵道中遇居簡上人

姑蘇觀下逢居簡帽子欹斜衣懶散自言契闊漫東西
雖老猶能青白眼知音不在禪林久抱刺懷書謹奔走
反舌無聲亂草間回首盡成獅子吼荒蕪野寺孤城外
赤葉黃蘆日相對午睡雙鳩喚欲醒起傍生臺炙肩背
美筆濡毫總蕭索尚餘酒量添於昨語盡橫塘笛未終
東風滿面楊花落匆匆解纜攬程去從此相期更何處
一椀官酤般若湯把手同看獨孤樹

鄱陽湖

鄱陽湖浸東南境有人曾量三十六萬頃我昔乘槎渤
澥間眇視天漠坎蛙井浪何為而起於青雲之底日何
為而碎於泥沙之裏太極初分一物無天水相包若雞
子揚瀾可供李白青州杓彭蠡付與盧敖洗龜殼斗大
孤山沒處藏斲取來搯鼎鑄脚曾中八九吞雲夢似此
蹄涔亦何用安得快意大荒之東東復東指麾魚鼈騎

蒼龍

靈巖上方

嵯峨樓觀青山頭，昔曾避暑離宮遊。
吳王旌旆墮冥漠，至今古木涵清秋。
誰聽白紵歌聲接，細撲飛塵石榴葉。
銀燭吹灰別淚殘，夜半虛廊響行屣。
美人何處疑嬌覓，五色定化蝴蝶翻。
幾人深閨有餘怨，當畫巨櫟號驚猿。
千年惟見春風在，綠草雖存顏色改。
寂寞欄干繞斷腸，滿徑寒香不堪掃。
朝雲為我光徘徊，須臾徑入姑蘇臺。
遺蹤滅跡竟難望，葉落空林歸鳥哀。

菰菜

八分山下灘渚
叢穗彌望可愛

江邊野灘多老菰抽心作穗秋滿湖拂開細穀芒敷舒
中有一株連三捩剖之粒粒皆尖小整齊遠過占城稻
不煩春簸即晨炊更勝青精顏色好尋常艱得此欣逢默
計五升當百叢雨多水長倍加益十里定收三十鍾野
人獲之亦自足何用虛糜太倉粟連日秋風思故鄉况
復家田有茅屋墜網重腮鱸已鮮蓴絲牽葉又流涎急
歸收獲蘋漢畔細撥蘆花撐釣船

海棠

海棠最佳須老叢遠及百年花始紅歷看名葩此為盛
剛柯硬葉交相映倚石攢青二三丈雨膏倒吸胭脂上
髣髴璇霄發曙光細簇蓬萊綉旗仗露欲收珠色轉深
香玉萬顆藏春陰輕風欲透紫絲障一片朝霞傾入林
鳳城多少栽花處低嫩俱無可觀樹相對令人憶故山
年年雕萼掃朱欄只今惟有溪童在應放高枝棲白鷗

吳王試劍石

吳王鑄劍成自謂古難比試之高山巔石裂斷橫理那
無昔時人相逢干將里故宮宮中白日長春風野田百
草香有誰慷慨不平事被褐踏花推酒缸

煙波亭避暑

澄江橫匹練月洗黃羅扇捲盡白雲衣常星撒沙見天
低欲就人夜色凝深澗剡吸動微光時絳斗間綠涼亭
逼曠野軒楹敞三面萬象悉鋪陳隨機互遷變十歲逃
虛空得此方一遍相對坐談玄終宵亦無倦只恐駸駸

催曉箭湧上東方老銅片須着干求大帝君莫使陽烏
眼睛轉

禹穴

若有藏瘞空山中誰人反閉王笥峰虎笥不得不啓封
立石繚之應萬重不知靈變從何發爆然夜半橫分裂
但留一線與人窺未放白雲全漏泄古木蒼藤閉莫開
穴中惟聽是風雷神仙必有便門出得見颯輪自往來

題葛稚川移家圖

稚川移家入空谷手招白雲守茅屋惟恐人窺鍊藥鑪
鎖斷青巒瀉垂瀑只留一徑通飛鳥其間想透三仙島
野童猶滴鳳交黎村老閒鋤燕胎草又將外物為真物
反笑山棲衰草窰玉臼丹成兔欲眠蚯蚓黃蒿幾攢骨
此去世間應不遠尚存猶可分苔蘚兩幅生緇若可憑
先寄胡麻與雞犬

春濃曲

雨膏蒸土蘭芽熟粉魂淡艷凝緗縵柳條無力受東風

桃葉春江弄花月枕涵墜髮昏眠重綺帳驚寒替花恐
屏鎖蟲棲花粉蛾簾甲蜂攢抱殘蛹麥門冬長桑椹結
桐輪輾盡棠梨雪門掩車箱銅較閉瓶敲井榦青絲絕
君不見楚王宮中樂酣宴嫌怕旁人說春晚玉釵埋遍細
腰人章華臺上蒼苔滿

陸羽泉

擬酌松根泉先酌松下土甌犧副都籃拾薪自煎煮一
盃復一盃併酌連四五寄謝山中人腹痛不累汝

寓宿黃觀復書堂晨至海棠花下走筆呈蘇召叟
春風忽來花滿樹海棠最多繞欄吐客愁纔動不復安
兩脚春泥踏春雨高枝背面辭曉喧低枝濕透渾未乾
黥脂深重彩亦殷顏色滑膩脂肉寒五雲忽卷濃粧畢
曉來恣態俱已失悔不敲門請君出喫酒忍飢看半日
疾呼盃酌傾已遲但驚野雪掃還飛可能就賜醉眠者
爛嚼落花聽鳥啼

建寧浦城李頻行祠

建安梨嶽老梨木刻作唐朝建州牧香爐忽動吹寒仄
浦城環翠陰風來嶺頭頑石盡能走澗下奔泉皆倒回
猿猱啼兮鬼嘯野六玄虬兮四驪馬想須吟遠碧草亭
舉手高翻白雲寫峰為文通名夢筆楊公書堂曾散帙
麗月鮮霞付與誰煙墅有人還築室田父何所祈贈爾
青甍黑桑椹里儒何所求贈爾黃糧布囊枕萬歲兮千
秋既往兮復留抽蘭心折椒口簸南箕挹北斗不假竹
枝歌何須折楊柳只用秦原妙絕詞傳入神絃薦春酒

五雲門外小亭

醉中別高峰揮手謝平野
百里伴啼猿一官騎惡馬
飛花墮城隅槁葉積亭下
從教踐踏去會有相逢者

夏日泛祕湖

朝來泛舟花滿湖
亭午返棹風相呼
已收波浪入菱芡
晚開雲日媚菰蒲
羣飛鼓翼數沙鴈
一去沒頭雙野鳧
少留霽色定堪玩
可惜歸程時已晡

送覺新上人還越

古越多精藍名僧遞相接青林瓶盂聚丹壑樓觀疊今
乘秋濤便莫待寒雨涉何處聞鳴菴虛廊掃黃葉

琵琶亭

蕭蕭楓林青雜出間倚櫂尚忍送行舟繫此木葉下雲
開星垂山水蕩月在野江空夜振振淚復誰滿把汀洲
泥沙換葭葦顏色假變遷斐然殊感慨益以寡黃煙飛
高枝絳雪當道灑餘春去不盡併放湓浦瀉豈無夜深
彈寂寞少聽者尚有沙灘人時時說司馬

石鍾寺

山前削成面山後不露骨何人戀巢居結屋寄突兀多
風鎖寒殿頻雨閉石窟筍透獅子傾草蔽鴟吻沒髑髏
串胡神纓絡纏古佛燾燈影摧殘槁柏香蓬葍丹葉夏
猶在綠樹暑未發坳徑鳴秋蠶間塔起蒼鶻僧衣莓苔
侵齋鉢野菜掘梵度止數卷矧能備巾拂奔波道塗間
體倦神屢竭大險阨在前醉夢魂恍惚信陋獲安處不
勝塵土汨經房晚棲禪殆亦未易忽鐵鳳終日叫心頗

惡此物欲去欲住間征帆已超越

喜晴

久客無別望出門惟快晴茅店局促卧村靜不打更浙
澀漸有間四簷稍收聲俯身問童僕貪睡語輒驚耳邊
嘈噴動鄰房先戒行拂拭弄包裹人健脚亦輕溪春黃
糧響窻掃巨竹傾山路少泥土意想砂礫平捨夢棄衾
枕披衣散縱橫屈指計道里陟覺神思清菜老復命煮
小鮮豈足烹旅飯任麤糲芑苴且難成值雨及雷電一

阻三宿程南北互有適後先何必爭東方曉色至隱隱
天漸明分手出門去相引行水坑

櫻桃花

櫻桃未開花遶枝櫻桃已開紅滿溪花開幾朝今始見
人折人攀那得知黃鸝飛來問誰主對面相看隔牆語
今日銷魂事可明昨夜東風過雲雨

豐年行

長田一畝三石收截茅作圍遮水牛馴雞塞籠彘牢滿

大兒有親女上頭里胥關門罷輸送晴烏窺簷鼠沿棟
瓦盆瓷缶息老身還將孫子看迎神廟前擘紙青竹爆
餠糕粉魚夜祀竈

冬賽行

大巫舞袍奉酒尊小巫湔裙進盤飧野風吹樹龍馬歸
瓦爐栢根香滿地白衣老鬚撚向前叉手大膽不敢言
去年田家五分熟更饒三分百事足大繭千棚絲滿窠
栗攢兩握角出肉土臺澆酒再拜辭紙錢灰撲遠木枝

神語順從杯教吉鼓笛鼗打三日

湘東苑

湘東王好開芳甸亭臺環繞朱欄遍就中應教誰最多
庾信江淹日歡宴七十里園高木柵花柳燒殘少顏色
取次華林建鄴邊奚不移歸帝王宅曾經行處蘋蕪漫
賴此名存悉歆羨安知飛來不是舊時鶯舞去都非昔
年燕風擘殘桃過短牆更無人管任斜陽惜春猶有傷
心者認作徐娘半面粧

仲宣樓

仲宣徙倚思歸後，又復誰傳獨步名。
自昔城闐雖尚在，至今波浪未嘗平。
半規赤日沈荒渚，一縷黃烟起廢城。
梅落碎花催塞色，葭橫響葉弄邊聲。
驚寒牧馬頻回顧，趁暖賓鴻漸北征。
況乃有懷傷歲暮，登樓那不動鄉情。

兩宋名賢小集卷二百七十七

欽定四庫全書

兩宋名賢小集卷二百七十八

宋 陳思 編

元 陳世隆 補

端平詩雋

金壇觀

金壇深僻觀鐘磬少人聞
山果猿偷墮庭莎鹿卧分
木高猶帶雪石冷不生雲
正蕪黃連炷相從拜老君

晚登黃鶴樓

戚戚登臨地，淒淒欲暮天。
相看數株柳，不聽一聲蟬。
山冷雲生絮，江空月上弦。
無緣捨塵事，閒對白鷗眠。

施潭

歸程風強阻，春色有如無。
上水千帆健，中流一石孤。
雨衝尋屋燕，雲背立樁烏。
盡說明朝順江行，舊有圖。

山行

盡日羣山裏，知行夢幾重。
竹深春寺磬灘急，午溪春殘

旭猶雙塔晴雲只半峰豈無仙隱者恨不少從容

野橋

日暮野橋邊都歸醉客船數竿沙際日一片水中天影
落衝烟鳥聲移帶雨蟬殆非人境得江月又初圓

送姚希聲令弟歸剡中

客程何太急嵐月半雲分想暫歸天姥還來伴使君曉
吟千嶂雪春思一江雲若再經過此囊詩可得聞

秋屏

好山多變態排列在簷楹平熨澄江練橫鋪列嶂屏石
煙寒遠寺山雨暗離汀有意攜溪枕眼看直到醒

同李雪林飲山村

本來無飲興偶此到溪灘屋角懸雙瓠船頭繫一竿塔
高風便響橋峻雨隨乾莫怕城門閉行歸亦不難

送惟德上人還龜溪

為愛林間寺幽閒少是非因拋葦門葉來着稻田衣石
蕨衝雲細山蔬膩雨肥禪居安穩後更莫啓柴扉

甲申歲解官歸故居有以書相問者

近憑筇竹杖處處作生涯獨採傍溪藥自看臨水花愛
雲因北望對日任西斜惟有雙蝴蝶相隨直到家

送惠嵩上人住西山蘭若

孤雲無定迹又入亂山居既息禪機穩從教世網疎曉
香崑屋像寒咒石潭魚待我尋詩境看君坐隱廬

石塘

水陸盡經過地暄晴更和鳥聲臨水近人影向橋多細

雪傾殘橘輕冰脆立荷少為鹽米計聽徹竹枝歌

病起幽園檢校

病起無情緒池邊日幾回蟲聲低覆草螺殼細生苔暑
退蘆將變秋殘蓼續開久消環繞迹全若未嘗來

雙林寺

杳杳雙林路林深不易登寺幽憐宿鳥地僻喜聞僧靜
徹垂梁板寒銷背壁燈水邊人忽笑猿落過溪藤

送僧歸舊隱

自言歸去後只在故山邊
紗帽臨溪盥銅瓶傍水禪
書閒松塔雨春盡草堂煙
何故相拋捨沉浮逐世緣

水清堂偶成

數盃恬淡酒相就等閒傾
得失徒多感行藏任濁清
書閒風有味春盡雨無聲
但惜新栽柳相呼欠一鶯

酬李達可

歸心終自遂何必戀虛聲
轉覺青衫惡誰憐白髮生
掃花山石瘦洗藥野泉清
應有忘機者時來伴我行

寄杜北山

一曲小湖濱幽居不厭貧坐容禪子憩家就麴生鄰簷
竹侵燈衆籬花落竈頻幾時吟得句寄與豫章人

寄鶴林智福上人

深山高頂寺黃鶴舊曾留鶴去無蹤跡山僧幾白頭烏
閑齋鼓靜猿嘯佛燈幽宿約何時踐題詩向瀑流

幽居漫成二首

便入空山住休慵漢省書薄雲翻藥畚斜日送柴車遠

葉松花膩生涯薤葉疎抱琴誰共聽一尾石間魚
乍歸無定葉蕭索帶村居神樹當中朽人家著外疎藻
痕千漂絮花影一牀書何必為真隱相安便有餘

鹿苑寺

分半作民棲猶藏一曲溪鵲窺蓮葉座僧占菜花畦白
蠹魚銷粉青乾獸剝泥幸留唐刻在相伴峻廊題

馬鞍寺

水國何年寺蕭條野渡邊僧驅田雀倦神抱海犀眠細

網垂秋屋殘燈泊暝船
數家枯柳下猶有舊人煙

野蹇

客心懷避忌地險自多神
楓葉藏山魅松根抱石人
鷓翻蒼黑趙魚曝赤斑
鱗未必知風候惟聞酌酒頻

題逸人壁

深僻人稀到天然野意成
荷衝崩岸出草入廢泉生
曝木充山貨抽茶當地征
未須尋伴侶時有自來鶯

送蔣雲啓之湘中

出門歧路分願往不辭勤螢影侵湘月蟬聲隔楚雲頻
燒霜後籜多飯雨中蕢若過黃陵廟椒漿奠小君

送僧妙通遊平江萬壽

故鄉離幾日何處躡秋陵梵葉牀頭樹唐衣壁面僧雨
花粘舊錫風籜掃寒簷新偈期相寄呵彈破小乘

酬杜八同宿西山蘭若

西山龍井路俱有舊行蹤待得城中暇重期石上逢冷
霜粘破屐落月帶殘鐘擬踐相鄰約煩君買一峯

菩提廢寺

野寺孤僧住當春亦掩扉
曉鐘三板去昏杵一盃歸
古屋垂山榭幽窻養石韋
未容行客憩荒樹雨鳩飛

天申宮蘇文忠畫像

大澤沾荒裔靈山識老臣
微茫雲外跡哀病瘴中身
濕草寒碑夕晴花午殿春
高簷風雨斷猶避六丁神

誓節渡

髣髴經行地還尋古渡邊
山禽多白練溪藥間黃連
漢

漠將晴雨迢迢欲暝烟恍然驚夢醒二十有三年

白羊

路隔一重溪山深容易危驛亭惟有額官埃盡無碑竹
掛黃身虺林香白面狸得船爭欲渡先奔槿花籬

送人遊邊

平世絕邊籌憐君古塞遊誰聽蒯緱劍虛敵黑貂裘宵
柝鳴荒戍寒烽起廢樓到應先弔古慟哭峴山頭

春暮登黃鶴樓

欲盡殘春酒登臨事已違聽殘懷舊笛添盡禦寒衣鳥
向青山没人來赤壁稀最憐城側樹無可作花飛

為僧曇芳賦草堂

把詩從我者多是剡中僧結屋何山塢當門幾樹藤地
寒常帶雪溪峻不留冰贈爾新吟去歸題木葉層

江臯送別

把酒對汀洲相看發去舟迎風一分手驚浪幾翻頭燭
暗花消淚楓寒葉弄愁恐猶回首望終夕凭高樓

送胡宗原還臺山

故里杉松表歸程筍蕪初盃多常失飯囊罄只留書海
墨收秦氣山糧捨禹餘古來仙隱者多在赤城居

千金寺

十載他鄉別春歸逐浪層晚晴沙市鼓夜雨石橋燈帆
仄催乾葦衣寒脆薄繒舊時來往寺惆悵不逢僧

留別唐棲雲泉上人

水宿唐棲寺何緣更浹旬千山今日路三歲異鄉人小

殿眠身佛空廊折臂神歸時重作禮又拂一番塵

天章寺前小樓

容懷依古寺曲水茂林邊俯聽磬鳴石靜看山出烟傍
花清晚漱對竹冷春眠深羨溪僧樂幽居動歲年

野望

春日晚荒荒平沙極渺茫樓敞三面水城卧數條崗白
草吳京甸黃桑楚戰場長江俱不問一片瀉斜陽

楓橋寒山寺

江楓吟詠工幽寺冷遺蹤不改前朝路猶聞半夜鐘
地涼汀月皎村迴水烟濃試問誰曾見惟應獨有松

送黃同甫

人生各有安出易欲歸難古道春泥重孤城暮雪寒
酒鋒精似將詩業遠於官野穀如堪飽從君借鶡冠

應潭

林崦遞相遮分居兩岸沙地征兼橘柚土物半桑麻
水白來如竦山黃去若蛇往年曾泊此叢竹數人家

招鄭服之

歸心同一路況復在新年
夢著登山展閒隨渡水船宿
蒿迷舊隴春葑起閒田
卧醉天池上知君在我先

靈竺寺

有孟宗祠

不因純孝者古寺若為安
壁彩蝸遊遍爐香鼠踏殘鐘
聲嘶破挺旛影颭危竿
尚恐冬生笋時來竹外看

齊安早眺二首

昔日干戈地淒涼古塞情
軍同民雜戍州與縣分城野

曠孤鴻絕沙寒一騎行十年生息後人尚怯論兵
陰陰城壘靜極望不飛塵草色橫江暮鶯聲出塞春清
時應洗甲來歲又逢辛惆悵經過處都非往昔人

村市

細簇人家住中分破石崖竹門開店屋草市夾橋街水
別東流漢山橫北過淮並船頻借問同買出江柴

贈僧仲寶月溪

幽棲深絕地靜夜獨宜僧上下兩輪玉中間一片冰影

叔懸罟索光息過船燈獨坐觀心了無由更小乘

題夏肯父曉山圖

旦旦自天成中全一氣清漸分平與峻俄轉晦為明竹
閉鋪沙影松涵出谷聲機心都不動穩看日初生

孫季蕃故居

笑語失詆諧人誰不愴懷夢殘秋雨寺魂散夕陽街缺
竈粘煎藥乾爐積燎柴風流何必葬便擁菊花埋

題東麓歸自房陵

一年辛苦後收聚若為豐攝職全無吏攜家僅有童乳
春花下管漆溜葉間筒自此嬉遊地應須且浙中

兩宋名賢小集卷二百七十八

欽定四庫全書

兩宋名賢小集卷二百七十九

宋 陳思 編

元 陳世隆 補

端平詩雋

吳山仁王寺

山寺憑高夕未昏
上皇曾此定乾坤
甌閩散驛緣江島
龕楮收潮入海門
細雨亂花唐輦道
深煙疎柳漢營屯

何時汴水東流畔君返宸居臣故園

庾樓

欲望江山夜轉寘胡牀曾此對嘉賓傷心皓月長流水
回首清風不見人花落雉樓橫角暮草生鷗渚破船春
歸程豈暇頻登覽分付羈愁與白蘋

題豫章臺

何日遺蹤鎖斷崗更誰曾望舊臺荒百年南渡頻秋雨
一片西山幾夕陽石礙老松歌徑險岸隨乾葦出江長

斗間可是無佳氣又見飛鳥繞去檣

題滕王閣

高閣巍巍接水濱興亡纔問便傷神
鳴鸞東閣知何處跨鶴西山別有人
柳映落霞江渚暮草鋪斜日野田春
羣鷗亦厭多悲感偏與忘機客最親

送友人持節嶺南

吳雲迢遞楚雲鮮從此南征路幾千
漢使五羊登嶺日魯經三豕渡河年
榕穿白草飛蠻雨椒落黃芽起瘴烟

待及戍瓜多載石定無番貨入歸船

贈唐棲寺僧

山門寂寞唐棲寺別去閒居又一年
草暗暮田羣鴈遠花明春院一僧禪
雲房夕磬浮清雨水殿寒燈宿細烟
作得詩成無寄處幾回遙認隔溪船

連珠

遠望披裘日幾回
可堪江上暮寒催
雲飛曠野迎風斷
雪灑長灘夾雨來
馬踏野橋嘶破板
烏迷村路立高桅

暫須移向疎籬泊，遷就驚春一樹梅。

行吟

獨行沙岸不相攜，準擬沿溪更渡溪。
藥蔓交加蟲上下，柳花撩亂蝶高低。
杖頭曉伴春雲石，屐齒晴翻夜雨泥。
詩就隨時為人寫，等閒抽盡錦中題。

秀野

小作幽園傍宅開，只須數畝占樓臺。
石移林屋秋雲至，水帶松江暮雨來。
徑草散香迎過屐，砌花分影蔭流盃。

人家園圃應無數不似君能日幾回

孫伯符墓下

木葉蕭蕭暮草長夢魂曾斷九迴腸
空聞絳帕離章水誰見黃旗入洛陽
鴉噪暮園江阪迴龍盤春戍石城荒
赤烏不識桑田變猶自悽悽守白楊

天津橋

裊裊朱欄倚細波綠雲相對間嵯峨
中天車駕曾擒敵何日樓船定入河
霽柳午陰隨岸遠露桃春色過牆多

黃旗應適東南運已辨簫鏡九曲歌

雨花臺

細蘚桑莎瑣舊堆昔年曾見異僧回如何天上飛靈雨
不爲人間洗劫灰江接潮頭諸脉應地連崗勢一夫來
只今不假虛無事別是春風歌舞臺

鳳凰臺

一徑逶迤草自芳何為不復更翱翔應須舊國還宣武
別有高臺在建章白鷺背花尋塔路赤烏衝柳集宮墻

中興不比偏安事且對梧桐薦羽觴

烏衣巷

日落凭欄感慨頻長干橋畔冷殘春桑田蕪沒徒多事
蘭玉叢生更幾人風暖影翻花外燕雨多痕蝕草間鱗
堪嗟羣從成功後不及鍾山一尉神

石頭城

點點凝烟望未收六朝遺跡遍荒丘自從絳闕雄江面
誰把朱泥染石頭崗斷曉榛雙阜虎岸長春草一灘鷗

諸公多少新亭恨不是知心莫上樓

浮遠

橫障瀰漫恃此立長江東鷺轉湍流波間去海無多里
沙際鋪淮輒數州風勢起花山郭暗潮聲侵樹野田浮
無由望徹蒼茫外回首斜陽絕是愁

送趙山臺赴江陰

匆匆何事解朝衣甫為君王領一麾歷考近來成故事
就遷長是未多時寒更夜徹防淮拆曉舶晴翻出海旗

不久赫蹏應已到只須畧賦練江詩

岳陽樓

憑高望盡寂寥天與我閒情共渺然
平展暮雲三百里積停春水二千年
沙洲橫渡荆江雨石塔遙分岳麓烟
先我未聞飛劍術想須今度遇回仙

西湖竹閣寺

精舍蕭疎近水涼分明一徑綠沉槍
就移山近湖皆隱放出樓高寺倒藏
春透露梢齊曲檻曉翻風籜過修牆

長堤花盡人稀少來聽蟬聲伴夕陽

採香徑

繒甲如茶護此臺玉顏憔悴錦帆來一溪香草無蜂過
千里空葭有鴈回響屨蘚埋丹蜴迹縷衣花變粉蛾灰
誰知子夜歌殘日樹滿西山似綠苔

七里瀨

瞬息沿流七里遙感時回纜木蘭橈高臺未變陵兼谷
故國頻更市與朝風散亂雲通去驛雨消殘雪助歸潮

漁翁近亦無前輩一箇青銅不肯饒

南樓懷古五首

昔人有意久經營極望寒蕪遠更平
三國旆旌羣鵠散六朝樓閣一鳩鳴
雪消晴嶂沉孤壘風打寒朝入廢城
多少怨魂銷不盡草根燒斷又還生

事久銷沉只等閒好將深意遞相參
舳艫宵遁誰思忖屢展春遊自笑談
西日瘴回迷漢沔北風波逆上江潭
隔城方唱招覓引一拍殷勤至再三

茫茫迂曲度平川何處孤村近水邊烟護劉琮殘壁壘
雨沉黃祖舊樓船寒沙細擁菰蘆地破隴斜耕首耜田
見說去年秋潦後更無茅屋起炊煙

幸際清時息五兵舌頑無處說縱橫蟻書一夢難分別
蝸角千年強鬪爭丹壁郵亭新蜀道白樓烽戍古邾城
自知夜半徒興舞移遠寒雞不使鳴

夕陽光退杳難憑欲問江鷗只怨憎得意舉帆燒北岸
傷心流涕鎖西陵雪消蜀貨千檣下風送吳鹽萬斛增

且趣一樽相暖熱自非乘醉莫來登

山居春晚

索居牢落動關心但覺匆匆歲月侵無夢不因憐晝靜
有懷多是惜春深草香稚蝶銷胡粉花落蠻鶯變楚金
最是不禁芳樹色能消幾日又成陰

庭下枯梅有感

庭下同栽兩樹梅一株搖落一株開無緣春色相虧曲
有分晴光亦往來雲打枯枝愁漢驛雨翻雕鄂夢荆臺

綺窻不斷橫斜影猶有東風管碧苔

會稽山

衣冠從昔化文身峻嶽當天自有神
秦帝刻碑三十載越王樓甲五千人
江連雲氣分南紀海接星河近北辰
必竟興亡誰可料但聞陵谷變飛塵

甫里觀

陸魯望
故居

天隨清調何人繼幸有荒村故宅存
橘上蠹魚應屢變草間眠鴨尚能言
池亭暮雪兼風起籬落春潮帶雨渾

人啖菊苗終竟別屠沽猶自不登門

陳武帝釣臺

路纔容馬盡荒茅誰識仙人舊釣鰲
流水不隨船影斷
亂山猶帶彈痕高
春烟粉黑重生葑
暮雨灰紅半折桃
今日故宮何處問
東風應長對江濤

贈雪林李和甫

忽地相逢便解顏
沉兼終日看青山
精神摘柳哦詩際
標度尋梅集句間
春淡野橋孤艇遠
暮寒溪寺一鐘閒

匆匆又作經旬別
兩處東風各閉關

道中有感

遠程已過經行處
別有逶迤古道存
寺已寂寥猶有殿
水纔窮盡又逢村
一林枯木人分路
十里飛花客過門
必竟悉依生處樂
不知何事別家園

黃溪

匆匆寧不恨飄零
轉更分歧過別汀
世事總如迂曲路
年華都付短長亭
冢桃褪蘂無人色
社櫟盤根作鬼形

心自感傷人豈識回頭猶顧岷山青

朱潭

消散羈愁盆垣然況當初暖欲晴天清溪苔滑重抄紙
淺屋柴香正煮綿隔水殺雞祠社土過橋嘶馬入人煙
今朝自覺難忘酒應更無人笑謫仙

送人之漢上

木落千山怨別離自知難駐馬行蹄上書季子窮歸洛
獻賦荀鄉老向齊驛店破旗秋雨細戍樓殘角夕陽低

袖藏祕策君門遠，應望中原泣鼓鞞。

荻巷

波眼沄沄浪復輕，稍甦羈束過清明。
倩人覓路先尋酒，久客懷鄉始見餽。
松下紫芽肥野菜，竹間青葉帶山櫻。
自從一別齊安後，直到今朝始聽鶯。

感事

書劍悠悠屢變遷，老諳多故始知天。
汗青每愧拋長日，髮白無由逐少年。
暮雨暗消江岸柳，曉霜初透野池蓮。

此心懸解何須語人問惟應一指禪

送遷客

自謂別離難會面如何此地又相尋
往來雲物他鄉意輕薄風塵久客心
夜雨泥塗三里郭夕陽烟火數家林
送君好去加飡飯莫聽哀猿徹曉吟

送人之京口

競攜書劍去紛紛誰解登臨對日曛
北道荆蕪一江下南朝徐兗二州分
高樓角曉鳴秋雨遠戍烽寒起暮雲

莫把尋常望瓜步恐驚邊鴈不堪聞

留題唐棲寺

僧房十日相留戀爲怯生寒未到家
插岸斷冰妨蕩槳入簷飛雪助煎茶
香臺穴碎逃秋蟻古殿巢翻失暮鴉
惟有溪梅最禁耐傍籬爭發向陽花

送白判官

著書不就便相拋遠向襄州謁故交
里舍千頭無舊橘客程三脊有荒茅
買魚村渡捐孤劍沽酒山城解敝袍

雙鬢豈堪禁歲月眼看歸鳥又成巢

中和節

時節匆忙過隙駒可堪岑寂就船居不禁衰病慵耽酒
無益閒交懶報書風暖暮田歸海燕雨甜春水上潮魚
客中自是光陰速纔見新正又月初

送人之荆門

昔年此路達王畿荒畬燒煙事已非山向嶠函空北望
水隨江漢自東歸淒涼坂路征車遠寂寞郵亭候火稀

遙想思鄉怨歧路杜鵑花發鷓鴣飛

嚴陵釣臺

晴江萬里綠波來惆悵君房去不回秦苑河山歸故國
越鄉雲雨庇荒臺春風一道江離綠落日千峯杜宇哀
欲訪釣船無處所野花如雪滿汀開

遊道場山遇雨

飄然大作登臨想纔遇名山雨亦遊林尾亂聲猶間響
枝頭殘滴未全收濯翻野竹從教躡衝落巖花放出流

欲把姓名書石上幾回粘筆又成休

浣紗秋日五首

衣裳單薄鬢蕭騷獨凭危欄首屢搔
出壁亂雲分片段
隔江飛雨見絲毫
庭前斷續蛩爭響
簷外輕便蝶鬪高
多少好山俱在眼
愧無短屐共遊遨

當前灘號西施磧對磧看秋得句清
五色懸門秦一尉
六經充棟漢諸生
石叢細火團荒砌
野蔓疎金出廢城
目送浣紗人去後
又聞街鼓報新晴

長江淡淡樹疎疎掃却門庭即故居
蟲入暗間頻促織
螢穿虛筆屢翻書
破除暮色惟荒菊
薦送秋華有嫩蔬
料得故園分社酒
小苞青橘四腮鱸

自慚尸素常多暇
未放秋風變楚顏
一夢別離拋白水
三年端的守青山
野雞避鵲遮雞去
沙鶻銜魚趣母還
縱有亂愁消遣盡
淡雲殘日共人間

清溪樓閣暮沉沉
不覺登臨夜欲深
幾處捲簾催酒笛
誰家閉戶搗衣砧
一朝野霧三朝濕
十日江天九日陰

暗喜礙人公事少自來收拾送秋吟

羅家洲

對港近村俱有路扁舟倍覺往來頻
入秋破褐惟存線盡日收錢不滿緡
遠岸冷沙銜墜葉淺灘寒水卧枯蘋
未知行役何時斷縱使更深亦喚人

送陳雲崖遊三衢

吟得詩成若等閒為我開盡錦囊班
不專瘦鳥元和末要敵長城大厯間
帆入亂潮隨漲水帽衝殘雪度危山

從今便少春
游伴纔過
新正可得還

兩宋名賢小集卷二百七十九

欽定四庫全書

兩宋名賢小集卷二百八十

宋 陳思 編

元 陳世隆 補

端平詩雋

春怨

極浦蘋花白
空壕蘭夢紅
傷心城上燕
飛入館娃宮

送客

欲知行遠近細數杜鵑聲暗入蒼山去千聞是一程

冷泉幽愁

水源窮不盡垢膩生春襪未敢輒揭流且向幽亭歇

落梅

玉樹分明照夕流粉痕翻為碧苔留三更枝上玲瓏雨
亂浦寒香一夜愁

回山僧書就題書尾

憶昔同行題落葉寺前枯樹鵲巢邊不知今度苔枝上

多少秋蟲已化蟬

逢僧文禮二首

空山落日又逢僧
雨雜塵灰滿帽紋
但憶來時門不掩
麝香偷卧石牀雲

師說古香寮
舊開鮑昭曾為惠
休來至今猿鶴猶知敬
靜對寒星禮碧苔

秋夜

山門半掩浮雲闕
古道入稀芳草歇
夜深零露滴秋香

幽人獨步青蘿月

寄雲泉僧水頤二首

書來只說徃高峯不記松林第幾重
欲揀青巒問茅舍
秋山一樣白雲封

頌罷南華誰得聞
兩川寒玉一禪身
松邊彈舌低聲念
莫引龍來變作人

贈從古上人

山僧袖出新詩卷
字字馨香撲人面
清晨何處展看來

捲得梅花兩三片

野廟

野廟荒蕪倒掩扉寂寥香火客來稀
年年歸燕相看覩空滴春泥損畫衣

真娘墓

青鳥傳書渡海遲亂山衰草葬蛾眉
錦囊消歇餘香在狼籍春風豈惹枝

女墳湖

石龜無語對東風
海鶴曾迷曉市中
三十六鱗朝夜月
玉釵人在水晶宮

顯應觀桃花

白雲隨鶴乘將去
深碧桃花滿故宮
三十六簧明月夜
不知何處吸春風

四聖觀

小園寬占一山孤
別有墻遮古觀居
到了思波攔不住
水窗遊出放生魚

蠟梅

愛花偏倩獵人尋
殘雪偷春上棘林
山岸有誰先得見
冷香疎亞辟寒金

詠史二首

一曲呼凰下九霄
石臺春動海山遙
周秦戰血縱橫盡
猶卧白雲吹洞簫

碧樹重重蔭屋廬
分明青蓋畫龍車
南陽病叟成何事
便謂枯池活得魚

送人遊西山三首

昔人深夜看星斗鎮壓重壇尚有符偷寫只應蒼鼠慣
幾行丹篆繞春燕

鎖斷寒蛟亦有神冷波寒水病殘身誰收匙鑰權相借
畧放天池洗白鱗

抽鉛點汞舊臺荒何處搜尋舊草堂誰見洪崖最深處
一坑泥護石中黃

出關偶題

一曲長歌浙水寒
綈袍空往又空還
咸陽若有山東志
莫放蘇秦又出關

吳門送同行者之毘陵

布帆何處定逢春
身是歸人又送君
明日隔城回首望
冷花寒月滿秋雲

西湖初夏

花飛春減綠陰成
不住風光繞禁城
山寺曉晴蟬欲噪
柳林猶轉數聲鶯

送曲江友人南歸

憐君歸索路迢迢到得茅齋轉寂寥
應歎藥欄經雨爛土肥抽盡縮砂苗

客樓

水國秋清潮半生越王臺殿鎖荒城
西樓一夜思歸客斜倚朱欄獨聽笙

夜深

虛堂人靜不聞更獨坐書帷對夜燈
門外不知春雪霽

半峯殘月一溪水

胥門

蘆葦蕭蕭生晚潮
伍員何地更吹簫
夕陽自逐寒鴉去
萬片宮花共寂寥

送人還姑蘇

別十三年返故居
可憐世業半空虛
布囊惟有焦琴在
乞與秋風葬闔閭

題僧子溫畫水墨蒲萄

裊裊多應半熟時
落斜高掛冷攢枝
分明記得山窻下
一架寒藤帶雨垂

望太湖二首

獨立瀰漫灝氣中
倍饒雲霧香
重重直西一道孤
光起指點人看是白龍

眼力難窮遠
即昏縱睛惟只兩三分
今朝林屋人皆見
不似峯巒只似雲

叔家信

渺渺秋風生白波故鄉歸夢隔山河可憐一紙平安信
不及衡陽鴈字多

聞友人過吳

詩囊掛在船蓬上吟過江楓落葉中爲恐吳牋題不盡
秋風先噪數堆紅

彩雲橋

斷橋流水兩無期殘日輕雲處處疑乞與行人自沽酒
滿旗風雨豆花籬

龍井道中雜記二首

白髮宮人頻笑謔
羅衣昔對君王著
夜驚春雨洗桃花
夢魂猶掛鞦韆索

老僧病久聲嘶喝
屢說紫衣勝短褐
莫嫌兩手漸拘攣
曾把御前供奉鉢

山崦早梅

晴逼寒苞春滿鄰
漢奩芳額漸輕勻
東風未放全消息
兩萼愁香不見人

青陽驛

悄悄如秋麥氣涼山風吹透濕衣裳小爐深幌枯松火
一夜寒香遶客牀

舟次黃鶴磯

俯爲江山特地來勢須時暫走塵埃稍閒便著攜官酒
一醉吳王舊釣臺

聞鴈

此是衡陽第幾羣寂寞偏雜雨聲聞如今遠道多增繳

莫厭高飛入暮雲

風惡偶成二首

柔櫓雙隨下水船
亂帆輕柁遞相先
無端繫著山村岸
高枕蘆芽對雨眠

三日要行還止住
冷沙寒水暗消春
一千四百蕪湖路
怨雨愁風多少人

溧陽桃花

見說謫仙曾到此
東風千樹鎖雕牆
游人偏向花間醉

雨濕春泥噴酒香

延山渡

解帆登岸作山遊
林木茅茨共一丘
數日驟寒消不盡
尚餘殘雪護松瘤

蕭山縣下遇雨二首

年來沙漲卒難消
更覺西興渡口遙
冷坐看他騎馬客
半鞍泥水踏春潮

悠悠心厭出江沙
過得丘亭轉落斜
村店自知行客倦

勸嘗新酒賣甜瓜

太洲湖

人居澤國勝居陵十月陂塘未結冰
葦亂菱收拾後斷筐分曬折腰菱

道間偶成

彎彎田角路周遭摘盡柔桑露淺蒿
無限寂寥門半掩一車偏建夕陽綠

早春

連朝微雪暖消疑始覺春風逐旋增今早畫簷徧有意
數條吹折曬殘冰

送人之漢上

舊來邊塞自多塵瘦草寒花強作春見說連年更悽愴
亂螢隨趁兔迷人

思歸四首

關裏看山不識真偶來軒檻振衣塵諸峯便覺移相就
分付春風欲去人

點點楊花飛滿洲只應催促送行舟非關向晚傷心事
自怯春寒不肯留

晝日憑欄客興濃山雖西繞水還東便乘春暮家園去
猶及棠梨滿徑風

自覺才疎久願歸敢將山色便相依漢家事業雖全盛
亦放梁鴻一箇飛

贈野逸二首

時康難售賈生醫諫鼓無聲對落暉又報一年花信了

蒲山題鳩送春歸

悠悠行路雪侵頭
擬出重關洗敝裘
堤上忽逢憔悴客
背花停酒說通州

下渚秋暮

淺灘近渚沙相接
水落漁人朝暮涉
撼撼風鳴若雨來
繞堤吹散乾荷葉

秋日馬上

本無謀畧強談兵
每媿臨邊病未能
筋力豈知猶可喜

一鞍千里到江陵

許市單魚

網邊分得尾纖纖
腥却尊絲莫厭嫌
自有野人相料理
柳陰茅店一包鹽

歲除思歸三首

六言

山樓書到多日野
渡舟橫幾回想
見溪邊亭上故人待
我銜盃

春風冰斷千尺曉
霽雲開百重
何處溪橋爭渡
誰家山

寺聞鐘

野屋定堆落葉山徑應鋪石蕪一別經秋不到隔籬黃

犬誰呼



兩宋名賢小集卷二百八十